

蘇州府志
(乾隆)
一一

生子當如龔朝美自可不愧彥文後云

王士堅傳
參縣志

張和字節之正統己未舉禮部廷試擬第一上偵其眇一目易

置二甲第一遂謝病歸景泰庚午聘主江西鄉試明年授南京刑部主事乙亥召修宋元通鑑綱目天順初還南京歷員外郎郎中辛巳出爲浙江提學副使儀範肅然待諸生有恩義甲申以病歸抵家而卒浙士數百人賻哭哀之如父和廉介端謹足跡不入權貴之門聞忠賢節義事喜躍如自己出不喜議人得失嘗曰人當於有過中求無過不當於無過中求有過讀書數行俱下爲文立就旣仕猶苦學所著有條菴

集

姑蘇志王士堅傳合纂

張穆字敬之和弟文章與兄頡頏宣德乙卯舉於鄉不肯赴公車曰兄弟齊名何有先兄一第者及正統戊午和亦舉於鄉己未同登進士授工部主事歷刑部員外郎中天順改元擢山東副使兼理學政鋤強去貪一道肅清表伯夷閔子孔融狄仁傑慕訪孫復石介之後給以衣食在平修志命斥華歆進馬周東土服其風化成化初進浙江參政解官歸無以自給門人故吏爲買田松江以老焉卒年七十三所著有勿齋集又邑人夏遂字存良亦己未進士授禮部主事以才幹聞

早卒

黃雲鼎
參縣志

沈愚字通理號倥侗生父方字孟舟清修好學積書數千卷皆

親點校愚博涉百氏以詩名吳下與劉溥諸人稱十才子其
詩清美圓熟尤長於古風有貧籟集二十卷吳飲集五卷善
行草曉音律詩餘樂府傳播人口斂跡不出業醫授徒以終
其身弟魯字誠學專攻古學爲文奇麗閱博一時稱爲作者
制行修潔居家孝友所著有經制權略人倫師表坐道論老
成集等書

姑蘇志參
王志堅傳

沈訥字文敏愚弟正統七年進士授大理評事陞寺副景泰元
年出爲福建僉事督松溪銀冶正額外不求羨餘盜起慶元
入松溪界訥以計擒之得不滋蔓五年鄭懷胥復亂訥在政
和得報卽集衆勦捕縛其渠帥尙書孫原貞上其功天順二

年遷副使歲餘卒年四十六柩還之日閩人悲號擗蹠遮道
不能行訥身不踰中人而天性明敏每聽獄兩喙爭譟訥一
言折之無不得其情志尙高潔爲文章必責已出所著有免
園遺冊下里餘音

姑蘇志參
王志堅傳

葉盛字與中崑山人正統十年進士授兵科給事中師覆土木
諸將多遁還盛率同列請先正扈從失律者罪且選將練兵
爲復讐計郕王卽位例有賞賚盛以君父蒙塵辭不許也先
廵都城請罷內府軍匠備征操又請令有司儲糧料給戰士
遣散卒取軍器於天津以張外援三日間章七八上多中機
宜寇退進都給事中言勸懲之道在明賞罰敢戰如孫鏜死

事如謝澤韓青當賞其他守禦不嚴赴難不力者皆當罰大
臣陳循等議召還鎮守居庸都御史羅通并留宣府都督楊
洪掌京營盛言今日之事邊關爲急往者獨石馬營不棄駕
何以陷土木紫荆白羊不破寇何以薄都城今紫荆倒馬諸
關寇退幾及一月尙未設守禦宣府爲大同應援居庸切近
京師守之尤不可非人洪等旣留必求如洪者代之然後可
以副重寄而集大功帝是之尋命出安集陳州流民景泰元
年還朝言流民雜五方其情不一雖幸成編戶而鬪爭讐殺
時時有之宜專官綏撫又言畿輔旱蝗相仍請加寬卹帝多
採納明年上弭災防患八事帝以兵革稍息頗事宴遊盛請

復午朝故事立報可當是時帝虛懷納諫凡六科聯署建請
多盛與林聰爲首廷臣議事盛每先發言往復論難與議大
臣或不悅曰彼豈少保耶因呼爲葉少保然物論皆推盛才
擢右參政督餉宣府尋以李秉薦協贊都督僉事孫安軍務
初安嘗領獨石馬營龍門衛所四城備禦英宗旣北狩安以
四城遠在塞外勢孤奏棄之內徙至是廷議命安修復盛與
闡草萊葺廬舍庀戰具招流移爲行旅置煖舖請帑金買牛
千頭以賦屯卒立社學置義冢療疾扶傷兩歲間四城及赤
城鵬鶚諸堡次第皆完安由是進副總兵而守備中官弓勝
害安奏安疾宜代帝以問盛言安爲勝所持故病今諸將無

踰安者乃留安且遣醫視疾已又劾勝卒調之他鎮英宗復位盛遭父憂奔喪天順二年召爲右僉都御史巡撫兩廣乞終制不許瀧水瑤鳳弟吉肆掠督諸將生擒之時兩廣盜蜂起所至破城殺將諸將怯不敢戰殺平民冒功民相率從賊盛與總兵官顏彪破賊砦七百餘所彪頗濫殺謗者遂以咎盛六年命吳楨撫廣西而盛專撫廣東憲宗立遷左僉都御史巡撫宣府請量減中鹽米價以勸商裕邊復舉官牛官田之法墾田四千餘頃以其餘積市戰馬千八百匹修堡七百餘所邊塞益寧成化三年秋入爲禮部右侍郎改吏部出振真定保定饑議清莊田分養民間種馬置倉涿州天津積粟

備荒皆切時計滿都魯諸部久駐河套兵部尙書白圭議以
十萬衆大舉逐之沿河築城抵東勝徙民耕守帝壯其議勅
盛往會督撫詳議盛知時無良將邊備久虛河套未可輕議
乃會諸臣上疏言守爲長策如必決戰亦宜堅壁清野伺其
情歸擊之令一大創庶可遏再來又或乘彼入掠遣精卒進
搗其巢令彼反顧內外夾擊足以有功然必守固而後戰可
議也帝善其言而圭主復套師出竟無功人以是服盛之先
見八年轉左侍郎十年卒年五十五諡文莊盛清修積學尙
名檢薄嗜好家居出入常徒步生平慕范仲淹堂寢皆設其
像志在君民不爲身計有古大臣風

明史

鄭文康字時父其先汴人南宋始家於崑世爲帶下醫父王字
有林天性孝友沉毅簡重博學強記精醫術人稱雙松先生
文康長身偉軀目光耿耿射人尙友古人氣蓋一世登正統
戊辰進士見者咸以公輔期之觀政大理寺聞父病請歸養
未抵家而父亡母亦尋卒悲悼數年加苦宿疾遂不復仕家
居枕藉經史雖病不少休尤善經生義出其門者多取科第
好談忠孝節義表善興賢闡幽弔古若嗜欲然爲詩文頃刻
數千百言稿成輒爲人持去其存者有平橋集十八卷多記
載時事有益勸懲而文尤簡質有法度

王張二傳列朝詩集
縣志合纂 王志堅

日文康嘗自言少時有友十八日以倡和講學游從爲事當時有忌者呼爲十鐸方言鐸猶癡也至爲十鐸詩其後皆有

官或爲聞人十人者沈愚及弟魯自有傳陳助見陳皞傳周叙字叔倫以貢官主簿張謙字克讓以貢官知縣夏祐字存賢以薦官鑄印大使沈祥同登進士官參議黃琚呂穆皆隱居不仕琚鐸之子也又有周號者文康妹婿工篆隸及畫梅片文康探竒弔古之事皆爲佐之

孫瓊字蘊章其先長洲陸氏以父後崑山孫道庠遂冒孫姓家崑山瓊舉正統戊辰進士授刑部主事歷員外郎郎中凡十五年公廉平恕如一日故事每歲終以通問罪犯類報尙書選諸郎明慎者重加審錄瓊被選及引對內廷無一人稱冤者江西安福彭氏泰和龍氏蕭氏爲邑人所訐奏詞連數千百人尙書屬瓊往治之悉得其實寘於法監生王喜爲盜所攀久繫不決一鞠得其實立出之每出署被訛者羅拜馬首

蘇州府志

卷二十一

七

常數十人曰是能生吾者也天順中錦衣指揮門達恃寵黷
貨用苛刻羅織人罪既抵部郎官莫敢異惟瓊多所平反太
監牛玉假子犯法囑瓊瓊不少貸由是積怨權貴竟以同官
得罪連坐謫戍遼左成化初復官月餘卽乞致仕年僅四十
家居篤於禮度終日端坐未嘗傾側所居朴陋人不能堪而
處之裕如喪祭極其哀感每旦必衣冠拜先祠非疾不廢卒
年六十八所著有鹿城稿子裕乙未進士官終知州

姑蘇志
參王志

堅
傳

梁棟崑山人父孟鏞洪武中爲館陶主簿指衆食貧乃贅其少
子鎬民家母意甚憐囑鎬背識之灑淚而別孟鏞既卒棟思

鎬不置白母詣館陶已失主家所在嗚咽奔還爾後隨所至
輒求之垂三十年後以事寓華亭東禪寺會大雨有僧袒而
決渠露癍痕棟見心動就與語卽鎬也載與歸相友愛終其
身子昱字文輝性持重初婚三口喪父茹淡寢苦竟禪除不
入寢舍正統十二年領鄉薦授平定州知州省刑緩賦州民
德之卒於官歸櫬之日哭聲載道孟羹瓦飯相望子統字尙
素成化七年鄉貢通判漳州陞泉州同知愷悌清勤兩平巨
寇民爲立石頌德

張大復傳

支琮字敬將崑山諸生家貧奉母不能具純綿冬寒母不能寐
輒取己所服青袍覆母疊跽而坐有郡倖慕其爲人凌晨往

候之母睡方熟恐驚動不敢啓竟以短衣出見倅知其故嘆息而去巡撫周忱聞之槩帛正統間選爲南京留守衛經歷

張大
復傳

朱爰字希仁璲從子年十九登正統甲子鄉薦會試中乙榜歷諸暨浮梁訓導遷昌平教諭天順末嘗上疏言臣聞圍獵近郊其徒弗戒驚動陵寢祖宗在天之靈其能安乎上聞卽爲

罷獵後遷臨川石首教諭典試山東河南陝西得人稱盛

縣志

夏璣字德乾景泰甲戌進士授應城知縣母喪服闋補新淦商稅引錢積至千兩舊例皆以充公用璣悉籍以備賑富人周某殺人璣寘之獄周賂當道欲出之璣不可無何調大庾璣

去富人乃得出新淦民爲立生祠擢爲御史出清軍浙江籍
無漏者而民不擾以疾告歸杜門簡出日惟養親爲悅璣性
好飲在應城嘗醉後撻人母戒之已而母亡遂終身不飲家
居四十年未嘗輕入公府兄弟三人皆先卒遺孤纍纍同居
共爨婚嫁之費皆出於璣自奉簡儉食無重味出無輿馬清
修苦節終始如一日

王志
堅傳

朱萱字樹之天順八年進士授大理評事萱能詩歌筆翰皆有
師法而泊然自守年輩有第望劣於萱而位出其右者衆或
不平萱曰出處固有命耳略無愠色以疾乞歸卒葉盛爲誌
其墓深惜其不究用焉

王志
堅傳

陸鈇字鼎儀崑山人少與太倉張泰陸容齊名號婁東三鳳舉
天順八年會試第一成化二年殿試第二授編修預修英宗
實錄遷修撰侍皇太子講讀鈇進退閑雅敷奏明暢滿九載
擢諭德孝宗立進太常少卿兼侍讀充經筵日講官得疾乞
歸卒年五十詔賜祭葬官其子爰中書舍人鈇在詞林以端
謹清峭稱其爲文簡勁有法詩亦如之所著有春雨堂稿春
秋抄略爰字子引負才喜聲詩作字端勁屢使藩府饋遺無
所受忤劉瑾致仕後起原官遷禮部主事

明史姑蘇志王
志堅傳合纂

王庭字元直少學於葉文莊文莊甚器之領鄉薦授鄆州學正
遷國子學錄再遷潘王府右長史卒庭孝友廉慎在鄆時就